

鹿

裴

石

室

集

鹿裘石室集卷第九

宣城梅鼎祚禹金著

文

序

贈教授張西垣先生擢南國子博士序

令甲鄉校官繇甲乙科者率遷爲六館師亦非異數也然以今張先生遷南國子博士則余咨咨嘵慕于君臣之際有盛世之風焉蓋張先生離母腹而孤母夫人彌未亾人者幾三十年先

鹿善石集卷之三
生始舉進士令南安踰歲甲辰

皇上大計吏南安令以最聞迺伏闕上疏曰臣國維亾狀荷 上寬恩還治縣顧臣有母少寡荼苦畢志以有臣今日年且及耆慮衰損雅不欲勤于遠而道臣治數千里驚湍沓嶂不任戒心臣獨子與母命相倚實不任烏鳥之私儻蒙徙鄉校一官俾獲就養則臣至願幸 詔下銓部議報可于是張先生遂教授余寧國郡而奉母夫人來也是時京師一時翕然名張先生孝

矣余郡故瘠土之毛不足供甘臘張先生吳人
也茶薜橘柚之屬時時載自吳具羞于母夫人
當夫人耆志益暢益良食健步履余郡之縉紳
士率躋堂致觥焉交相頌之曰貞壽而先生嘗
郤門弟子脩脯不內曰吾有奉備母養而盍以
養而親乎于是一郡翕然稱張先生孝非獨有
之且錫爾類矣然而先生猶喜不勝懼也走境
內羣望爲母夫人祈千百之年卽境外若白岳
九華帝畤佛宮必乘閒以往乞靈而益母之算

又于于焉不肯爲孝名居二年張先生之薦剡
日騰于朝有博士之遷然薦者稱脩明經術
振作士類而已而主爵者跡前疏知先生之所
爲大節在孝求便養也故博士不以北而以南
先生之僚及其門弟子合而詣鼎小子屬有言
贈先生計先生自鄉校逮博士雖崇庳內外殊
要皆職教也古者鄉之教則三物成均之教則
三樂抑孰不原本於孝陽道州爲國子司業語
諸生學所以學忠與孝也簡孝秀德行升堂上

三年不歸侍則斥之而諸生之謁還養者二十
輩固教誠有本爾博士綰六館佐司成以孝若
張先生者達教本矣抑何職之不舉焉夫務舉
其職而不遑顧其私者臣義也務使人必舉其
職而兼卹其私者主仁也下不以靡鹽廢將
母之懷上不以率土忘賢勞之歎其庶君臣之
際兩遂乎而余于張先生遷也咨咨嘅慕有盛
世之風云余友海虞陳先生者張先生鄉人也
又同舉于鄉今方爲六館師經明行脩富著述

鹿善石室集卷九
與張先生相若也本朝名公卿大夫多發跡國子余見兩先生自此升矣諸君子執是以券會天子以孝治天下覃恩殊渥張先生南卽得拜封母夫人此異數也并藉爲賀

婁雲王先生拜國子助教序

今天下師帥之官內則尊而成均兩司成以逮六館外則督學使者以廣厲于上郡邑博士以職詳于下凡使士經明行脩文質具而風俗美也然而論士自鄉始則邑猶要焉夫治緣教成

教緣地設綜之固未有不自身出者王先生吳之婁人也繇乙科署我宣城教諭事吳自言偃以來故文學之國王先生所爲文本之世業叅之匠心卽奇氣旁溢精采注射而必務程于先民諸弟子咸志述而手模之以卒歸諸馴雅顧先生以宣本吳西略卽文學不甚相懸遠其大致則在士敦本而維風是時爲邑政者頗嚴重士有求不無見抑抑之久將不無激且見亢王先生職教而佛政沈毅有守吉月衆頫之外無

私覲無副封諸弟子始進之贊歲節之間遺一切簡謝至其情有所當申誼有所必遂往往爲正色誦言于長吏長吏亦輒懼服敬憚之與士漸脩相見禮而稍時其餼稟平其賦誦士因以退相戒無輕跡有司之庭傷王先生之義一時謂王先生調劑其間若甚難吾見特赦躬潔而已居四載爲丙午夏先生用累薦拜國子助教之命且北矣夫國學之與鄉校崇庳廣狹異埶也其人多燕趙齊魯晉衛關雒之士忼慨

負氣節直中重內無南人佻巧纖麗之習而至
舉京兆升於司徒則南人率遠勝之彼其文固
不勝南也王先生出其憊然之藻淵然之蓄以
孚翼而資飾之當必有應焉南北異尚故因俗
適宜若其沈毅之度端廉之操王先生始終恒
有之鱗蟲之長五色遯變而神龍無欲則難致
親下之植四運遞化而松栢貞勁則後凋其性
一也性一則天定不受變于地不就化于時以
是而槩王先生何獨良師帥誠慥慥有道君子

哉先生行有日貧至無以治橐裝諸弟子意欲
贐先生而口不忍言也詣鼎小子請以一言代
余方謝未能先生之察括蒼葉先生來曰王先生
生北宋先生踵而遷海豐東矣語有之莫三人
而迷曾子焉張張奚所之殆不後諸弟子之依
依也余忝世講於王先生葉先生嘗師顧學使
于吳久知卿邪家世爲詳始興公起典午千有
餘歲入我明而名卿大夫之勲有踰王先生
之先世者乎古者周尹氏漢韋氏之屬皆世官

非世其官也蓋以德世也吾于是而竊闢大司
樂掌成均教胄子之深意焉或又惜王先生遷
大駢不獲載上公車廻董以六館進也殊不然
國初耆碩由此其選余所睹隆萬之際則有南
太宰海公從乙科起家署教事此亦直躬潔已
近代名端廉人也

君擢王侯膺薦序

余少脩郡乘知郡之屯政敝極也恒嘵焉嘉靖
中張御史者銳理屯廻以升改今清之三則而

唐書卷之八十一
樊名案撥其於初任力領輸之意微矣蓋屯之
敝一敝于豪民之兼并而田頽虧再敝于大猾
之侵牟而軍實耗又三十餘年今衛尉王侯君
擢以督屯特著聲頃于郭君惟中所得讀侯所
條上郡臺八議抑何其洞利弊之原于名實損
益之際明辯以晰耶始也在斂之得其人則俟
有定僉收清詭寄諸議繼也在散之有其式則
俟有禁揭買慎給票諸議悉報可行之二年而
積逋完新課集士有宿飽庾有贏儲且出其羨

幾及四十金歸郡帑要以疾累已奉公故能令行姦止規指經度有機要以故事給而力紓一時撫監爭下檄嘉勞之晉握篆掌宣州衛事仍督屯直指王公按部薦于朝有曰射策名高三捷清屯弊洗百年衆羣以爲允昔趙營平畱屯金城漢庭之臣相詰難予者半至璽書切責後將軍何緩期營平持之堅諍之力陳其便十二遂用以下先零罕开而羌人終不敢侵漢司徒以土地養民者也大司馬法其致民與大司

徒共之因四時之暇抗以師田之律則屯之功庸孰尚焉或以建武驕遠而扞邊乘障得驟顯王侯閩外之制抑由此北鄉乎余不然五湖之間有輕心久矣加以水曠之薦臻礦榷之爲暴閱世者于內地有隱憂而郤顧之不皇卽吾六郡中分兵使者而治之若吳淞狼山江海要阨竝舊置大帥摠其兵侯異日任也以侯才地所向誠咸宜人臣第効節官下唯上所使爾侯之先肇封名和者從胡越國定杭歙從李曹國蹙

元主至紅羅山則嘗于南北皆有功傳至東川
公豪雋爽伉顧學其子于先大夫儒而夭時葬
庭公始孩嗣爵以疾解授君擢爲子侯則受廸
母郭恭人爲多恭人故惟中姑也婉嫕有才略
歸于王值王氏中微内外惟母所綜理訓其子
以圖振廓之而師友于費君子兩惟中間二君
工屬文侯遂以文起家郡學生兩舉武闈雅歌
緩帶有敦說之風茲且鬱有嘉問勛伐日寢寢
益張儻肆號恭人爲武昌之定魏夫人之貞敬

以顯父母令名于無窮在君擢矣惟中語余君
擢之以屯著被薦也繇府君馬公假之以便宜
而復爲之推上以贊成其功夫營平金城之烈
良繇魏弱翁爲主畫將相龢則士豫附不自古
記之哉諸與王侯知交者屬不俟敘次其事爲
侯贈以侯之祖嘗學于先大夫有世講也

贈葉司訓膺薦序

自班氏之傳循吏與儒林也若學與政判矣而
以徵漢事出則羣牧入則九卿率用經術取高

第故治猶有本近古云迨于今制頗顥尊經術
然于古實無所師承要以媒進趨而資逢世其
求也質以爲羔雁其獲也棄以爲筌蹄其不能
盡獲董循次以進也往往不肯爲黃綬吏而坐
擁青璫爲廣文先生伊吾咷嘆故如經生卽間
有攝篆之檄不欲行蓋檄者乍使前而隨伺其
後攝者姑掩襟而旋露其肘超格旣難通材亦
鮮則學之於政非特不相爲用且交相敝矣吾
司訓葉一之先生獨不然葉先生恬蒼人也甫

髫籍諸生業已布其文東西浙婁試輒冠其諸
生而旁工古文辭松陵顧道行理栝蒼賓師葉
先生致于吳俾子弟事之數年余里許君彥貞
爲栝蒼承及守也益心師先生來則下榻往則
虛左顧先生名甚翔數甚綺繇鄉校而廷對
凡十一都試不售也來訓吾宣者四年於茲矣
先生鴻朗闡達而縝緻有雅度殆良吏才也臯
比之暇雅游士大夫觴詠間適彥貞里居抵掌
道故余常參末席焉會當事者以先生攝寧邑

先生辭不可寧俗囂習訟而子衿氏好持論官
府短長頃之迺無不誦說先生者大較謂決事
敏御下嚴清不矯廉刑不勝教士民皆幾幾祝
先生卽眞而直指使者當報命薦先生于朝
其稱曰瑩如楚玉利若吳鉤言德器與材諧兼
具也繼之曰技擅雕蟲任堪馴雉言政與學之
平通也直指誠知言先生亦不云非遇矣雖然
荆山之璧市以連城禮以九賓而薦諸明堂清
廟重之也今望氣者聊一占白虹之光采而已

泰阿之劙五步不畱行千里爲厭伏卽武城之宰亦割雞之試而已抑終何足概先生而爲先生重乎比年主爵稍能破拘攣蒐瑰異仰追

國初並用之得意則先生茲舉也其始發鋤離璞之日乎必更有歌神寶以相明而重任先生以擊斷觀良者世固不乏通材也經術之効不益亦尤昭灼哉葉先生之僚長爲甫中曾先生晉陵董先生並一時獎薦三先生皆今聞人君子也又萃于一邑良爲勝事恬蒼守識先生最

先庶夫稱今之水鏡矣而所爲觴詠游二三士大夫者屬予鼎祚敘次其大致旅謁爲葉先生贈焉

贈太平令許靈長先生膺薦序

善治者太上因之固矣然而嵬璫闊冗者多托跡焉其始以安常襲故自文抵漸積以至于大壞極敝中乾外溢不可爲有亂而已儻非其人材博碩邃識超覽起而爲之所則或驟而廉失之剗有所侵疏而有偏不舉之處要亦卒偕底

于亂又安能勝其任而稱善虧以余睹吾郡六邑獨太平之竊蠹蠱慝久矣先是諸長吏率常代去而曹史緣新故穴爲奸比及丙丁之際有以丞攝者肆姐冒利上下相蒙而下緣以輕其上猶不可使禁令中格謠誣易興當事者患之以言于主爵太平令必重擇其人丁未冬武林許公靈長遂從銓領太平誠重之也縣人知許公絲擇任已潛憚之且聞公自諸生以才負盛名公卿大夫間其人脩儀直幹眼如曙星卽豪

素恣睢望見公若已鉤摘其隱伏掠眾于其
頸不暇咸竊恆驥惄恐思相與逡遁迺許公之
蒞政也平心揖氣特申敕其下去泰去甚它明
與之更始而攻苦茹淡官舍如精藍爰書籤牒
手自注記左右不得闕縣所爲害治者莫如訟
蓋太平在萬山中山入貲最饒俗故齋奉養厚
幾詰亟則走南北權要恃居間爲嶧公壹切謝
絕于理曲雖彊有力必麗之法然亦盡法而止
會禮官修謚典公舉縣直臣周太常轉聞

上

察良褒節表佚闡幽俾有所廣厲不盡倚法也
今傳公以讞焦氏獄有旋風之異駁杜子甲舉
于閒夜殺人無左驗爭謂神明顧此實非公精
意許公意恒出于愿慤忠篤務敦命胥誨以庶
夫道洽俗美焉當公至之明年歲大侵縣陦田
希少卬食他郡公倍斥奉勸分已責奮相嚮義
單車歷村落計口鈞賦復不肯增戶數侈大其
功以其所贏建常平用具儲峙猶旁邑所難計
公臨縣甫期月而耳目一新習染丕變維風起

敝游頌行謳將非已可之會乎頃者御史臺若督學楊公視江李公適報命並薦公于朝若總漕監河之格外崇獎者更纏纏也不可爲非獲上矣夫革當必已日之孚則非驟蠹治有後甲之誠則非疏變而必通者時因而無弊者道許公以易魁北闈茲其用不達于政哉余少治古文辭初識公吳越之交而公于學無所不駁尤工六書爲時楷式是時郡太守爲大梁金侯雅知公虛衿而聽因獲以盡展其材志抑時時

推轂之此許公所由以克濟有成者也余友杜生孟明焦生仲弢譚生儀若暨孫生明六輩皆所爲士之雋而公優遇者述其邑搢紳先生旨命余鼎祚一言爲公贈固以余違辱公交生贛不能爲人謂公其先本關西亢爽有亮概亦不受諳也夫諸搢紳先生不以許公無私徇而間公議較余邑厚矣厚矣余邑二三子與有霑溉者併得書

天柱會贈董學師膺薦序

世宗朝晉陵有中丞荆川唐公憲大夫方山薛公一時制義爲世模楷今所號四大家者晉陵兩焉薛公督浙學持灑精品藻有人倫之鑒唐公起家國史猶博贍工名理知兵善伎擊及風角勾股多所旁通此其人雖已往要以其遺書足鏡而術也余邑博翼吾董先生少承鄉先正之學肤篋誦法且于其賢胤皆有媿昕夕焉游息而上下其論議受餼鄉校間名久翔至都試輒中格遂以優敘薦于廷來爲宣城司訓也三

年於茲矣宛陵之文習輕俊或詭僻不經先生從察長公課暇別有天柱之會會凡數十曹則先生執牛耳而盟之緣本兩家以意裁飾務俾衷于庶還弘正之醇風戊申臺試錄小學選東序者幾及廿餘稱得人盛固先生一變之効也二陵並吳地華而漸於靡先生端韻冲穆望者知其爲君子而以質劑宣之文程之以實預茲會也益相戒斌斌修禮讓一變至道又先生之明効也董氏在晉陵爲甲族余與先生先世

有年誼時嘗過從譚泳迺先生于古昔成敗失
得之林當世利便鴻鉅之務內甚督則何獨擅
經術之長而已先生每語諸弟子經術正所以
經世夫寧以和筆濡墨徒學而無用者哉于是
知董先生之外若樸茂而篤固顧所以善藏其
用也比學使者楊公察吏儒之良具牘報一命
以先生材優從政薦實洞見先生之內而有所
以用之矣然余竊有進于諸君卽就唐薛論中
丞負大名寓內淮揚之名人不無求多蓋是時

倭事孔棘公亦欲有所微見長以少紓國家東南之患至其生平嚴一介糲食褐衣殆志士也袁文榮煒爲薛公門人及拜相有爲薛公賀者公不應人曰孟子喜樂正子爲政非與公徐應之曰果樂正子也則可喜厥後文榮卒無所表豎士貴志有立先生之期我友者意良厚豎直以名爵通顯爲余因費子子雨汪子大宗蔡子永叔諸君子之請爲先生贈而余姪好綴其末令次先後語以復兼致勗焉儻一有當于先

生者乎先生行且長百里師牧一方掄材鄧林
所造益廣其大旨固具是矣

贈郡太守金公入觀兼過箕城爲壽序

自聖學不傳而後代各以其意識見解爲學漢
經學之傳咸有師授建議莅政一稟于經故吏
治稱良莫盛漢然皆因時就事其于道雖一隅
時合而天人之微性命之奧槩未之達也文翁
以教化稱要惟興起學宮使弟子授七經小吏
學律令蜀郡得比于齊魯中和樂職布在益部

亦稽古禮文之事而已宋際濂洛理學脩明迺其人多沈下察扼時禁不獲盡展其所學而于用顧亦鮮効焉我明王文成公起東越超然獨悟本其真知施諸實踐投轄大而克舉處危疑而不害論者猶以其根柢象山原出蔥嶺吾郡侯大梁金公獨推尊文成而心儀之嘗以爲社稷之衛道盟之宗蓋金公志聖學久矣錄晉令徵拜南曹郎南都諸君子爲祀耿恭簡羅旰江二先生有同志之會公日與弱侯焦先生相

合併交切劘于是浮疏者推其密膠固者服其
徹湊泊者返其腔斷滅者孫其通咸以爲公之
學獨得其傳凡數年守余郡又二先生過化地
也盱江前爲守最著有特祠久茀不治公下車
卽修謁爲除道闢局以風厲郡人士盱江在郡
純任德而于讞詳禁令簿書期會之間時有所
縱舍于世灋時取簡易不甚裁公勤力自効官
下材開敏而博大六邑之弊害便利靡所不洞
晰而異心觀理酌情與世靡所不平亭首爲新

郡學學有會鄉遂有約皆精實行之而振士之
淹使旅進不以貴妨所規撫務先訓定之迺御
吏嚴幕佐以下無預事爰書藏計宿蠹一清然
公寔不欲用彊譽民意翹翹在民隱也戊申之
潦凶而不饑卽屏博徒平市賈賓禮革具算器
無加璧襲帛細若省梨戶之征畫漁戶之地冬
則身自行賦寔人口錢夏秋命醫分施藥事制
曲防唯冀以寬其力而贍其私以故四封之內
式化阜生刑幾措不用余鼎祚竊謂此我公之

實用然亦公之應跡爾若飛者戾天虛空無跡
照者臨物色象自取頃亦讀公之明手斧鋤矣
夫以手明手之非手也不猶以指喻指之非指
耶悟則臭腐爲神奇迷則醍醐爲糟粕圓融周
徧貫萬函三誠不可以識識不可以解解者矣
吾師乎吾師乎世但以跡而名公卽入覲而
以牧郡良膺異數之典光寵公固于公之潛脩
默證悠然無所挹而加汪然有所注而不盈也
神虛形實體冥用顯聖賢經綸之學蓋如此鼎

祚無似辱公折節而進之以頗多學誦時時有
喪志溺心之諷而根鈍習氣深不能發上蔡之
一汗遂名

上負二先生二先生鼎祚昔從游

者也茲于公辭不敢溢美而於公之學或抑旁
闕一二焉公素廉儉是往也持一襍以北太公
及太夫人書來曰以時之若多收數斛麥足爲
若行資矣二尊人年踰七秩公過家稱觴上壽
官中一物無所將二程之于太中珦尹和靖于
善養之母竝以其子理學顯非公之鄉先達乎

文成西征之役海日翁書往復以忠義相勸勉
父子之一心乃爾公心儀文成而庭中之遇亦
略類因併志之

郡中送太阿金太公入覲序

余不佞典守文史與在交戰之內竊窺今天下
大執內雖稱治狀亦斷斷矣宮府睽鬲庭議沸
而國是淆卽端揆之地喉舌之所弘化何繇乎
外而藩臬郡邑雖位局一方事猶顓制若郡固
有臨之上者所興除裁請爲易達下儼然提衡

諸屬威福千里二三寮家左掎右挈尚得以展布其材志彼重內輕外仕之恒情顧今類若欲釋近而就遠歟使然耳頃年主爵者不能得之內而于郡慎擇守良輒報聞余郡迺得守媯都太阿金公焉先是公令太原會中貴人之權三晉者其孰甚張莫敢誰何令迺獨力與亢以衛民幾蹈不測賴 上神聖竟得完公念其身

上所賜也益感奮勤毖于政當上計用廉令旌已拜南戶曹主榷維陽羨金千有奇封還官則

又用清郎名其亮烈性有之而鴻博高朗材靡所不遂吾郡預稟稟將無武健雄斷意求勝之乎金公之言曰牧之于民猶農之于禾長其兄而去其弟耳然公徐簪其情形知郡固可長者治也大指在拊循務以道相董正里市歲時尚俳優飾歌臺酒食徵逐子女狃雜宣之俗澆而善謠小猜輒騰飛語文致短長公一切屏絕勿復通約士于學宮申之六行而僇其亂羣賓禮其好修者皆不以文建鄉社讀灋宣諭使其子

弟若訓于父老余以戊申春過里門蓋目睹其
風猷其敦厲教化之意居多乎是年大潦民羸
幾卒而以蠲卹請卒安之若覆盂者誰之功邪
溫陵陳公捧賀北語余公括藏七千金告糴隣
省轉輸繩相屬穀賈遂平不給則斥俸勸分口
賦以等差次鉤校悉有法今夏雨小淫公虞損
麥也日于署齋向天叩頭千亦唯其寮旁聞之
陳公者郡丞也時倅爲趙梁公司李滇楊公公
與人洞見庖裏而處僚友間猶坦易平直魚魚

雅雅若墳箎之和甘酸之調焉卽鄉士大夫無
敢持私進而好來焚枯酌醴驪晏終日于是退
而私詫曰昔爲強項令履虎尾而逆龍鱗者非
金公其人乎今胡然其春風拂時雨潤也或謂
公初以太阿自命霆擊電決五步不留行旣而
若承景含光弢精挫銳益足爲世寶此雖近似
猶頽言公也蓋公久篤志聖學而又該洽外典
眞常妙明之體緣寂待感而微彰柔剛之用當
機互應聞公自政術外間以學與三公參證莫

逆于心明歲元會公上最計府必膺旌典如令
時卽舉國初事峻陟卿輔是爲內而非外矣
夫羣議之所繇囂而國是猝未定也起于意見
之各異激于曹黨之相傾廟堂猶之乎郡國也
以公之協恭和衷讓能推美者風示之抑庶幾
其庶動乎然余郡固願久之竟其惠公畱內遠
則社稷之衛近足救一時斷斷也余卽忝同
籍在宇下不敢請公誠欲計安天下抑豈遽忘
吾郡亦三公之眷然于懷者焉

諸邑贈郡侯金公入觀序

今上神徽端居法宮而威靈燁赫恩澤滂霈戴
斗之域若在綿几固以所與我共天下者其良
二千石乎比戊申夏江以南連數十郡水歲大
侵余郡寧國界旁郡獨棘至 詔所在假予貧
民金錢十數萬余郡董及千而卒道無流亡市
無踰賈萑苻絕警關棟晏如視旁大郡獨贍完
則郡侯箕城金公之請蠲申貲已責務分是又
安我而屬邑令君胥于以有成也是時公繇南

曹出守郡一年所矣當公之初莅也雅意揚扢時有所張措闔郡爲振而偉儀壁立望之儼若神明在羣屬亦罔不祗服夫履高者難爲下材鉅者多自賢淵魚之譽烹鮮之喻殆渺危得焉而公初不爲亢引逆距虛沖洞達自寮屬以迨耆庶咸溫然接之各獲以傾寫其赤憮殫其所欲言寸長必采弗以下體遺聞善必行無爲空譚設卽與諸令君相面命或下尺一牘諄切隤惻猶家人父子之告語也要無一念不在鄙民

隱而剔吏弊吏治則民安自昔記之它非有大
戾也雖參幕之微又必覆露之蓋公精心爲理
故皆肩脅雙息不敢罔上以行私公仁心爲質
故皆志慮摩厲不忍負上以底違然余竊有闕
于公矣泉穀出內獄訟比詳諸令長優任之將
欲使邑弦歌而里親睦則所務重教化吉月朝
學宮脩士業歲時延見父老讀律宣諭以約束
其鄉固一國初功令也傳有之上專用德則以
本教而持國因此其績揚百世之庥風豈與振

一曰潤一隅者論廣畝遠邇哉公之鄉先達呂
中丞明職書于治體甚辨晰公梓布境內而中
丞之呻吟語公序而約之以澄神養氣則其大
本大原也伊洛在彼淵源有自漢所稱二千石
進而九卿雖以經術興去學道之旨邈矣潁川
渤海曷足擬公往公起家晉中兩爲令當覲以
廉能見旌茲復由守覲天子上計最首膺異
典超次畱中吾士民何怙恃之以儻徼天幸
上重軫東南歲侵之後姑賴守勞養以逮今時

若也賜璽書錫金如漢還治吾郡用竟其惠利
之施則諸令君且得久事公抑余不佞之所幾
幾願者也而不佞猶圖卽報滿將援朱吳郡陳
湖州故事帥我士民以增秩久任乞諸 朝會
因諸令君之屬言効駕而志吾臆如此余不佞
忝籍公舉南宮辱在宇下饗德深傳循吏昉自
馬班亦史氏之職爾行且執筆紀諸令君矣

贈楊司理任大原郡丞序

仕也類重內而輕外長孺願久于禁闈子高約

結于劇郡卽漢治近古賢者已然今且北畊重
南矣余不佞兩令晉陽入郎南司農以出守宛
陵晏如也是時宛郡丞閩陳公司理南詔楊公
先余至倅梁公最後自趙至相得驩焉越三歲
楊公以徵行蓋楊公之爲理也藉藉聲著甚
而程書之上計府者大約兩端曰廉曰仁夫用
人之仁不問其廉而廉者又多刻害防于仁則
儻旣之爲難顧公皆有所受之公之廉受自性
澹泊食不貳味衣不純采而交際猶簡在官鮮

旅幣之將算器之餉至其仁受之先贈文林公
嘗爲憲都曹見刑人于市也而傷之遂解去命
司理治尚書有味乎咎繇好生之旨也公以刑
名官念非其先志故日唯明允是兢兢卽余所
記臆釋不辜之辟汪應官輩三十餘人矣方徵
命初下郡士民及旁邑大府靡不抃躍以爲司
理無負官執秩無負理邦之司直諒在斯人公
謝曰吾聞爲官擇人不爲人擇官所在儻獲奉
一職足矣余灑然異其言未幾而太原郡丞之

除目下郡及旁邑大府之初抃躍者又靡不轉而爲歎噫憤咤走叩部使者申不平之鳴余語寮二公吾知楊公固必安于丞蓋竊有所闕于公公起家爲理凡七年所什七扈巡什三署篆非詩人所爲詠跋涉而歎賢勞者乎公處官若家視身若遺淹速壹不入其心何志念之深焉夫内外猶之淹速耳彼仕外輕而內重要起於務求進而速化者也如欲速雖四日而周三臺猶爲淹能處一卽九域而奉一職猶爲重楊公

前所謝士民之言若有先幾抑有定力矣太原
故余宦遊地連數十城而爲郡以屏翼京師驛
者傳言偏關闕丞公適當其任蓋偏頭連十八
堡以蔽全晉全晉安則京師安其地猶重而丞
主兵轉饑虜之欵市咸屬焉其職視他丞爲雄
楊公具智略因時應變周還不窮余嘗許之爲
邊才今邊事漸隳兵威久頓遼左已岌岌殆矣
而恭順之閼氏且老憊識者焉可不爲長慮哉
公勉矣異日而授鉞建牙若年恭定馬端肅之

于晉則余不爲不知公卽執秩亦不爲負理矣
公旣行余瓜期近將釋郡而陳公梁公並才賢
尋將遷二三兄弟誠不無分衿贈縞之感焉

又

郡司理楊公之應名行也余邑鮑侯旣偕六
屬徵言徐少司空矣宣首邑鮑侯承事之日視
旁邑最久觀法爲最近其欣欣色喜於公之徵
而依依不能遽釋公也爲情最眞寓書某申命
曰始不穀令安義楊公之政理流聞江介大約

謂其節甘而志苦材高而禮卑及徙宣城獲奉
公左右則習公廉儉自性贊幣不及境殮壁不
及門疏衣糲食無所芬華夫廉者多刻而公獨
寬然長者嘗誦歐陽氏以大儒爲畱推至論刑
惡其意非惡其人故公卽奉三尺惟謹怙終則
辟更新則含不欲爲深督窮治以勝之四境內
外歸之如流水而恃之若司命才高者多高自
厝而細物獨予雄而難與羣理以灋爲官然而
田賦兵戎膠序陵藪之事皆其所決筭其任重

撫監臬使暨郡長吏皆其所寄權其體尊未以
公之才風馳雷舉靡所不旣五歲中嘗署郡篆
兩署宣涇署春穀異時異地靡所不宜迺雅不
自有其才溫共簡易上無所挾下無所陵卽令
之無似公不難拊身而慄然意下之由然耳提
而命之以革免于大戾則彼賢于令者益可知
故又咸服公之度勝也某先生非今之龍門蘭
臺乎敢以 宮直之暇冀徼惠一言某唯唯因
間閱司空之爲言則以能任特稱公夫昔之能

任者莫踰伊尹合千古而尊之曰聖之任當其
畊莘之際致嚴于取與督微于一介要以一介
之辨督而後一德之咸有是惟廉故能任爾至
其廉而不剝猶所難能尹不云乎惟商以寬兆
民永懷接下思恭與人不求備則笞身恕物之
義也公與鮑侯並以書起家書之言刑莫善臯
陶其謨曰寬而栗愿而恭直而溫簡而廉楊公
其有之惟知人故能安民則公之拊身而下鮑
侯且推之居前挽之恐後不可謂知人耶頃者

訟言盈庭虛華飾實其敝也亢之使高訐以爲
直分曹銳進植黨背公開上以無稽弗詢之
疑而成下釜鬲燭竈之執誠有如司空所慮謂
百能言不如一能任者此其端咸肇于鋌走險
而違讓德也有虞氏二十二人稽首交讓女咨
女諧率以亮天工熙帝載夫郡亦猶之國也以
楊公之明允懋著而引重承我鮑侯之精瑩吏
治而歸德所尊耦俱無猜和衷共濟蓋師師有
虞廷之風焉公茲繇郡而趨國矣是以克讓

爲杓而不伐爲功也夫遇闕于塗一人拱手則
攘臂者斂一夫緘口則諱語者息主爵者之首
徵公其意不淵且遠哉公今行矣行當爲我
天子耳目侍從之臣不言則已言必有物不爲
則已爲則協中越歲而舉鮑侯于朝臺省旅
進魚魚雅雅某備位官采竊親睹其盛且爲
國家之大同慶也

鹿裘石室集卷第九 終

鹿裘石室集卷第十

宣城梅鼎祚禹金著

文

序

郡太守金公擢徽寧兵備憲使序

徽寧之設治兵憲使也自弘正間始季年兩浙中倭島事急故鎮桃川以東控吳越

今上初有于湖之警江事急故移鎮秋浦以西控皖濬金陵中屹爲三輔隩區而我

高皇之寢廟官常儼然在焉重可知已于時媯
都金公守余郡以最聞余從貴竹來偕入覲
嘗就公而論政下繇州邑上逮監司余因謂監
司之雄鉅疆理之廣姚未有如我宣歙而其繁
劇要害亦無如宣歙難大江千里派彭蠡而引
荆巫重湖枉渚牙爲出沒頃在丁戌一夫作難
至勤王師粵昔山越之區其地采阻其俗剽悍
大校陸則獸挺川則鯨奔雖鞭之長不及馬腹
此一難也省臬所轄郡三而止茲獨倍之六郡

一州仰于我乎質成而俛於我乎承式課吏治
飭武功察嶮隘咨原隰平賦決刑皆其有事且
時時副諸臺巡行部內郵傳如水簿牒如山雖
敏者讓未皇精者患不督此二難也持中丞節
而繡斧稱直指以出者數踰十政出多門見各
岐畛安得而分身徧應壹意孤行此三難也畿
南仕國也土風習借資爭造請順命則骫三尺
衡命則生衆口此四難之猶難者也夫必德威
惟畏亮概不阿秉羔羊之節展霹靂之手庶克

有濟焉意者我公其人乎公瞿然謝曰守父母老以公之庇獲徙近北望親舍其下幸甚旣余還里徽寧備兵闕則兩臺業薦公得請矣噫嘻人情豈甚相遠哉而六郡之文武吏若士民喜可知也寧直宛陵郡丞陳侯倅梁侯暨六邑令長宣鮑侯寧趙侯旌蔣侯遺書不佞光祿嘗往言四難于金公抑有所爲易者乎公虛已而渴善屬吏願奉光祿言以轉聞余躍焉報之曰夫事爲于其易則難者至爲于其難則易者至然

非所以擬金公也公高明偉人也兩爲彊項令
有廉幹聲甫蒞郡適歲之不若磬磬者之以澤
量也迺爲之請蠲請賑屏文法簡科條然而公
小露其額則千里坐照若在堂皇百函立剖無
濡期會斥一二墨者而丞尉胥史齒戛股票負
霜雪于庭鄉猾市魁雖僻而窈咸驚若雷電之
見臨而我公今總師旅據上游誰敢生心挺而
走險親跡其不逞蓋公爲郡年始強氣完神王
性耐繁勤勞不自便未嘗告餼至退食委蛇猶

有餘畧也何難于六郡至誠所通獲上有道公
上謁一而見灑然異再而怡然說以解三而聳
然敬且慕卽素號鷺鸞者亦心折公舉爲江南
北十四郡之冠自鄭襄陽蕭漢陽以還所未有
也唯賢知賢何難于諸臺余聞郡中士大夫當
公在事頗自束修無敢以私進蓋外憚于公之
清議而內慙于公之清操不戒以孚不威以肅
風之被也四略固已久傾之夫詩有之惠而好
我示我周行寔羣大夫及不佞某輩所爲拜公

惠者也二三君子其益昕夕承式公相與以有成冀公必加惠無已夫上行而下効立政之經也上安而下龢一德之符也此殆余所爲易者耶猗與行覩其盛矣

送金兵尊上池陽任序

當我金公之繇郡入覲也既駕而馳一日郡士民條羣然驚走驩呼曰執秩懸宣歙觀察需我公矣衆以質鼎祚固未卽信然人情可卜焉今春公薦有豫章晉陽之推郡士民復羣然轉

相告曰公遽以晉楚故不爲我有耶然猶援副
封以自寬而疏留中之是冀越兩月東浙之臬
以主名上而與公最續之期會也于是郡士民
始信而頃頃焉不自得轉相詫曰夫浙誠首藩
杭嚴孰與我三輔重聚族而謀以泣挽當路則
兩臺適已請于朝奉俞命矣衆于是愕者解
憤者平頃頃者躍躍其腹果其願盈復以質鼎
祚鼎小子稽首祝天曰彼其蒼蒼者正色耶視
聽自民桴鼓必應所覩我六郡一州者單厚矣

非死也獨得私也曷敢忘北鄉稽首而致祝
天子神聖恭默明見萬里上爲

烈祖培豐芑之業下爲畿甸永利安之圖君猶
天也曷敢忘要以公治狀大較有方少保之端
嚴潔已而公寬身長厚有羅盱江之學道愛人
而公吏事精勤有鄭司農之清簡不煩而挺躬
任事有蕭漢陽之執持不詛而材術經通之四
公者百年來吾郡之良牧亦方寓之碩人乎公
爲之撮其勝而舉其遺恢乎其有餘而綴輯其

所不足公猶嫌焉孫讓以未皇適求所謂太上
之忘我何有者志度遠矣然四公前後擢旁省
以去未有卽借以臨蒞我六郡若公者衆且質
鼎祚公在郡政主恩而道用柔吾聞治因之治
兵可因乎余對曰未可也夫所名因者因天因
地因民所利而已天地不以生成廢摶肅王者
不以利養弛刑章隕霜不殺書以爲灾如或承
敝襲舛是曰因循今兵頓于衛伍吏蠹于欺墨
士習于佻而細民之困兼并也非一日矣重以

寄託之鬼道案牒之神叢伏莽之戎鋌嶮之釁
若先朝嘗圍宛略江黃脫巾南都而括寇三簿
新都者交午牙蘖乎其間至不可究詰逆距則
何得晏然無事乎余小子願公以明作成惇大
以彊毅剣溫柔時出而儻行隨施而曲當實我
公之優爲者爾衆更以質鼎祚子言者公將朝
至夕發一埽而更之乎余對曰未可也蠱而事
革殆必已日翼而務入尚戒先庚勢重則不可
亟反吾願公持重而善完察于烹鮮去其害馬

有以爲而無以爲也雖然有本焉公篤志聖學
以無欲爲宗無欲則明通則公溥循緩急之宜
酌微彰之用而包荒馮河得尚于中行以此宰
天下可也奚有六郡余退而私籍其語公行填
池陽會族之諸父昆弟來謁送因出所私籍示
之長者曰昔燕人與越人偕濟燕人爲授維楫
衣祫占風嚮方計甚備旣而知爲越人也報焉
夫越人善操舟豈燕是賴然其意則款款自効
矣盍以此薦于公鼎祚敬諾拜祖敬亭宛句之

間嵬然屹百里而淵然照百尺者公之風德也邪

書南陔白華二詩贈金兵公歸養序

詩小序傳自子夏新安迺一切屏之溺其旨矣其序南陔言孝子相戒以養也序白華言孝子之潔白也繼之曰南陔廢則孝友缺白華廢則廉耻缺夫孝友廉耻人道之大經可廢哉然其辭軼久至晉東廣微從而補之或謂廉何與于孝今之仕者率相載以歸鳴鐘而食重茵而處

其父母欣然就之姻族里間交相贊爲孝友子以此在庸礎人誠有之鄭子張之戒其子貴而能貧田母却稷子之金也遂而無患賢者曠識類如此且人之情有緩急呼父母我德耶怨耶亦必及其父母德則祝怨則詈恒情固然而仕者猶甚以爲德爲怨者衆也夫吾與親一體而分吾以其身游汙瀆之中而欲其親濯清冷之境吾樹怨而欲彼以親爲德能乎故曰人臣孝則必事君忠當官廉或又謂廉者多刻刻則寡

恩人亦必歸怨焉予以此非真能爲廉者直干譽而已廉者於已有所辨而於人無所傷故曰溫而栗廉而不剝君子之全德也吾聞援神契稱卿大夫孝曰譽卿大夫言行布滿譽達遐邇則其親獲安譽非君子所辭也迺知潔白所以成孝養故南陔而受之白華義攸當矣嘗以是徵之憲大夫金公而益信公繇吾郡守秉憲畿南以迨今請養凡四閱歲鼎祚先後凡七爲文以贈公所爲威惠之績頗著論總而約之曰潔

已奉公寬身厚下若公念親老決去志則初與
鼎祚有成言公歸矣侍鳩杖而獻兕觥計必有
音樂以侑之是二詩者孝與廉相成而公具體
之以無負清白之訓所稱粲粲門子者義相符
鼎因以授副墨之子爲申其端公帥諸昆子姓
鼓掌抗足舞斑歌笙爲太公太夫人壽也當有
采于斯

贈憲使太阿金公請養序

今上以天下養方以孝道理天下周澤錫類下

迨臣子大梁金公初爲南戶曹郎聲甚著封太
公如其官階奉政母太宜人已出守宛郡也念
欲迎養則宿安家食雅意不肯恩官所請留侍
則太公太宜人堅不可曰有諸弟在公因置其
室以單車往頃奉命一來郡卽遣歸冀以代已
也甫滿就郡拜副江西按察使治兵徽寧鎮秋
浦復以單車往今年秋有事于漕至自淮遂以
侍養告不待報發矣于是郡人士聞而譁呼競
逐擁衙塞道咸謀奔憇上以身當車轍蓋公所

爲惠于宛淪肌浹髓家祝戶社則固在諸郡之先及秉憲約躬裕物而將吏之畏臬嚴于臺民庶之親公孔邇于怙恃五兵不試八行允章若所爲維風振紀遏暴持危則宛猶在諸郡之上守某與屬邑令亟渡江爲萬姓請命董及公辭未畢而公趣御者驅之行余曹皇皇焉悵然若失抑何以解于士民且姑慰之曰守不克爲若留公敢謝負幸而公之遺訓成績爲後事師者在也規而隨之遵而勿失庶幾畫一之願乎顧

此藉以自解耳名盛則難繼力小則難勝直瞠乎其後焉惟時有質于守者曰傳言大孝不匱服勞備物其細也夫士既違親而事主爲國家屈智力則爲父母詒令名始也求忠于孝繼也移孝作忠公負王霸略且駸駸嚮用矣誠篤孝曷不圖其大者乎有復于守者曰金公令太原與大璫爭稅事收掠其徒黨以抗旨聞幾蹈不測賴

皇上仁聖中寢則恩至渥矣就部守而擢部使

者以儼然臨之亦異數也君父一也公庭內拜再命榮矣捐一日之養任一日之職不足以明報乎是行也于子道誠得謂臣義何有更端于守者曰聖賢不能悖時而就功亦不能躡時而速化公期月可矣盍少緩以需有成乎往臬使未有終三年淹者公大度雖淹速無所問行道揚名殆論孝者之所必稱乎時哉亦不可失也守唯唯是三言者非無當要非以闢公之微爾公所爲在無能解於其心而務遂其志今之游

宦者望白雲而詠白華豈不思相戒以養有所
欲以斂之則寧詘志以從欲此患得患失者之
爲也公茲之拂衣而歸猶昔之單車以往實自
我最初一念而已故曰大人者不失赤子之心
焉知失時試觀世孰能不波公一行使世有難
進易退之士仰而贊天子之孝理足以風不
可謂非報也豈必盡陳力而効官哉守聞公二
親年始老公年踰彊會四封晏如故公得全其
私儻一有急則世必急公近若嚴文靖李文達

執國秉塞中丞開府薊遼皆具父母驩異日公入而機要出而鎮撫入而奉親出而奉國就養無方博施不匱謂之大孝非邪至是而益闢公之全矣宣城鮑令繆謂守知言以質于關司理及諸令籍之走一介而內諸公媯都之里第兼起居太公太夫人守與理生汝毫間並公鄉人也

郡丞清波陳公擢南戶曹序

贊哉漢文內張季之說也當問上林尉禽簿不

能對嗇夫從旁對甚悉豈誠非才然以終不勝
絳侯長者竟止不拜也其旨甚微蓋天下事多
成于湛深厚重之君子而壞于口給氣銳之小
夫口給則鮮情實氣銳而無德以將之憊矣余
不佞庚戌冬來守宛陵則晉安清波陳公先爲
丞未幾司理關公自毫至陳公五年中三攝郡
兩攝宣一攝仙源攝儻攝刑隨施輒效環應無
方迺公則去虛惰而杜德機出無事之心處不
競之地余嘗及司理公擬而目之曰陳公若萬

解之舟無所概于釜豆千頃之陂無所庸其清
澄六邑令君相耦語公溫共有讓處議當法似
黃次公重厚不泄安任大事似周絳侯近則循
良之選遠則社稷之器乎余顧竊有闕于公雅
意修古好學誦郡治在陵陽一峰帶以澄江屏
以遠岫公政暇手一編曰伊吾如經生而經生
有以文進者爲之評騭以私進者距勿聽余初
莅公極慨時所獨亟者士風教衰俗詭以羣囂
爲仗義以干視爲治生頃余檄學官弟子冀有

以維之蓋公呐呐焉粥粥焉外敦而內辨外寬而內栗往訓臨汀一生服而婚列其臯于郡雖迂郡弗顧令高明振荒察吏多惠政坐不習骭骭鄉顯者遂得調高明人至今訟言之是秋擢拜南戶曹郎行有日司理而下咸嘵焉以公通籍二十年勞苦丞郡者五年宜得守大府卽曹郎不薄曷不北而依日月之光而南禮若兵而戶曹耶余則謂此時宜也不佞故郎工曹預財賦之末議矣其入之塗一而出之竇九罔儲水

衡率並告匱言者累求多於大農至無以塞過及余來南聞南猶之乎北也士伍半虛威頓而驕漸不可長比且簿責主藏已夫輕重無恒唯所緩急急南則南重急度支則度支重今茲陳公之擢也殆重擇而使之抑豈常調哉丁亥祖公于敬亭之陽諸令君從因請余次其言登諸帛以代縞帶焉南司徒襄陽鄭公前爲宛郡守歷二紀聲方載人士幸爲我諮公所以治宛者何狀而善郵示我庶獲仰止亦陳公贈處之義

云

贈郡司理關侯擢南憲臺序

國家設內外臺以紀察百職綱紀四方並尊之曰憲司理刑官也往往從御史行部凡官師兵率徵逋校蕩靡所不寄命故亦尊之郡憲云然其初皆少年新進之士材銳志滿亟欲一旦翹所長以獨愉快爲名高而或器與用不相習地與時不相適者寔有之吾郡理睢陽關公之來也前通籍且十年所徊翔州縣歷諸轄其于世

故物情祛練久而陶冶熟風格整嚴儀觀甚偉
望之者意消氣憚固知其正人君子也而公簡
重自持脊樞機屏造請雖竟日不得其聲欵之
音噏噏之狀至起而決大疑畫鉅策片言立斷
猶之鏗然之刃解砉然之冰渙也間案旁大府
精心爲讞引經飾治唯取衷于法迺當路咸所
倚信焉先後薦于朝而號名司理者卒無踰
公辛壬之際郡適多故公佐寮長壹切務拊循
而鎮定之不激不隨衆賴以輯則二三大夫清

靜之効虔未幾而擢南臺憲史之詔報聞矣馬公偕貳李公倅陸公屬某有以申贈處之誼某繆守史局獲以攷見典制

高皇帝奠鼎南服特重臺綱首以元勳之劉誠意爲御史中丞至洪武十七年位署始正若所爲出入文牒叙次監巡則公今日之職夫以公望實誠爲少淹顧今臺務之重有倍于洪武時者

聖祖親蒞庶政故時尚綜核

今上恭已端居故時從寬平其敝也綱弛紀頽朋黨叢興國是固定羣囂樊亂讒說殄行此其由皆始于憲生事而任輕狡生事則生言輕狡則乘勝而鬪捷慮世者將圖以維其末而急振挾之有味乎傳之所云簡重焉御繁莫如簡簡則要約可循擇福莫如重重則浮競可息關公夙以簡重名者也余竊闕公有大度歷試以後孤行自若國僑言之爲善者不改其度故能有濟以擬公其幾耶頃年南北總憲累牘以

請輒留中副院丁公遷少司空北矣南臺之重
復有逾于北而倍于昔者公卽驅而南與諸侍
上下其論議衡量于繁簡輕重之間而持之以
靜嘿邇者庶其有豸乎某方退耕于野在野言
野今之秋螟蟊爲菑蛟蜃壑於陸穀賈踊而杼
軸空民亦勞止儻軫念閭閻之疾苦轉聞于

上否公無忘吾宣則又公今日之事也馬公雅
志鄏民抑二三大夫之良願哉良願哉

郡侯馬公入覲序

郡太守汝南馬公繇尚書冬官郎出守太原也
治理流聞卽南國且傾承之及前守金公拜憲
使飭我六郡兵吏部遂以公莅吾郡焉是年壬
子秋合太原之績攷三載 上最矣長至之月
覆奉所職用祇觀

皇上太原內轄數十雄緊之州邑以屏枕 神
京而外被邊其俗魁健好武民多凋劫不聊生
然頗樸質簡直會其時虜解辯回面守封約惟
謹無薄伐之勞故其爲郡也劇且廣其爲治也

猶易宛陵控陪都之上游

高皇帝軍興首徵發地重可知而風長厚式禮化然其地不得晉之什三僚屬厔及晉什五則其爲郡也稍約歲至庚辛間士囂而民嚚皆捐其弦誦棄其田作而習爲浮詭羯羶緣告訐爲姦利轍轢陵藉幾揭竿而亂時適有變故其爲治也獨難當公之爲晉陽也不以時謐焉無事而易心處之壹切拊循其凋憊者羈縻之虜或生野心眷收保嚴關院恒儼若有事之臨迨爲

吾郡也不以時夢如其事奮有所峻削急繩一切務鎮定柔服嶷然以無事處之間者播文誥于學宮俾多士若吾訓母寄請母黨比而兩造之聽無成心無觭重以協吾衷殆于法無所特加而于意無所偏嚮甚哉上意之不可有所偏也小有所偏將使薦紳士畏細人良弱者畏彊禦極則寡畏衆上畏下始之以無章卒之以無政是兩弊之道也吾以是知公之能審幾而持衡從宜而達變要非無事也行所無事則事而

無事矣又以是而益有所臆于公公不嘗爲郎
職水庫彼其遷變靡常濁蕩而不見其渙易運
難靖者孰如水然而至平者水也激之則怒涌
防之則潰越語曰五湖之間民有輕心性之耳
論者迺以地平夫成之茂勛歸之於行所無事
蓋馬公取質于至平之水而尚法于無事之智
何直以負材鴻鉅之于道不誠有所由本哉先
是公上績某受命郡丞李公別駕陸公修不斐
之辭以薦公頃以覲行有日而司理許公甫

自武林至相與申後命某不佞顧所睹公者冲而不盈尊而自下往太原之稱僚者衆率署空名去數百里而姚吾郡二三大夫則邇公左右戎賦決讞咸交劑以有成而于誼切游泳燕好昕夕其公焉是依而于情暱不無戀戀于公之行度公是行也績最資深必有崇陟焉儻獲如河內之借來復我長我莅乎不然則今兵梟瓜期近儻就移秩若金公者乎此豈唯二三大夫猶幸在宇下吾郡之所爲綏靖訓定者愈久愈

洽抑六邑士民嘉賴之儻

皇上念公績在晉繹西顧之眷績在宛紓南顧之憂大有以寵異公援漢事入爲九卿諸大夫行當以次徵日從公周衛之內猶之乎斯夕郡時也若我士民其距公實遠矣敬亭之雲宛句之波亦必往來公懷也

又

士君子肩國家竑鉅之任以尊主庇民扶危定亂非材曷以哉迺稽古昔周絳侯山太宰裴晉

國韓魏公輩彼其知略輜輶勛位恭焉著甚尚論者乃皆以其度勝焉夫所謂度者沈深厚重沕乎窅乎卽之靡見其朕探之罔際其涯斯固天畀之以運材而善濟事者也東漢諸賢志在澄清高自標榜而黨人之既卒與國相終始金陵宋之間人也一旦欲舉其主于三代之隆豈不足于材而靖康之豐卒蔽之過則以度之未弘爾余少聞鄉先正之論如此及通籍至忝副臺端獲預議吏治有質余者曰吏道之盛孰如

漢吏之良孰如黃次公顧爲相而功名損于治
郡時者何余咨咨念之曰自爲潁川時而條教
煩碎參考陰伏密及于米鹽察及于雞豚疑任
術而已占其非休休之度矣損招干意滿政怠
于官成固其所也故知嚮所論良信而度爲知
略勛位之所自出抑處始篤終之具乎明年癸
丑春天下之藩臬郡邑當奉計以 朝我郡太
守馬公在焉江以南旁大府必共手肅然日寧
國今之潁川馬公今之次公也徵諸銓評推諸

海宇亦必肯首翕然曰寧國今之潁川馬公今之次公也公之爲吾郡也綜大綱屏苛細修實作省文移謁飲有節訾笑不苟嘗爲姚江令聲籍籍至今因以邑親民逾于郡事之情形令必晰于守多以還諸邑俾令自治而郡報裁焉以故諸邑亦稱事治民安風移俗易雖以諸令公賢而我公實成之也歲適有故臺凡兩聞于上而士其一士之囂而挾羣也有年矣當路者頗有意痛懲之前後悉屬公公持平雖辟者無

深抵居三年所上焉任誠而不任術下焉見德而不見刑猶之喬嶽廣川蒸爲靈雨疏爲汪澤府萬物利百世而受者不知其功觀者不測其用班氏傳潁川而曰霸獨用寬和爲名其旨微矣馬公安所用名焉此非所云沉深厚重有休休之度者耶公治行吾邑鮑令君爲諸令君介于不佞某曰太守公先期最績之上與計事會是行也

皇上必有陟明之盛典焉若馬公卽未驟柄國

亦必留中在常伯之列以爲公輔地吾屬不得
長事公矣願得中丞之一言以祖公益鮑侯繇
首邑事公久與諸令君卷卷不釋于違公者輿
情也不敢以私誼而再借公者國計也某老臣
焉敢以田間忘公家之務儻馬公而淳致公輔
則號令風采必不損于治郡時國家其庶有利
賴哉方鮑侯有以命某也郡寮李公陸公許公
三大夫先有言以贈公矣公溫良有讓推心置
人腹而察屬並優游公度內余言于諸令君者

亦可以告三大夫也

治兵按察使饒公擢四川右布政使序

畿南治兵使者之有六郡而竝建兩牙也與繇桐汭而移鎮宛陵也咸今觀察豫章饒公始煌煌新命簡畀纈矣宛陵負山襟江適道里之衷遙以綰池皖之轂而近輔留都形執審矣選六郡良家子得比三河少年號精兵處究之具籍爾公于是蒐乘按軍實廣募嚴汰而申以司馬致師之法耗者登頓者振矣然公世以儒

術起家邃於學自郎署以歷藩臬歟事展采率
先躬行務道訓刑以待流辟而不易用兵以備
不庭不虞而已卽姑孰大圩歲薦崩當縣官賦
稅之半而民無轉徙萑苻絕警桃州素稱懷博
漸用柔服究大郡雖兼攝乎亦且瞿然顧化焉
獨吾郡士習儻放朋比干政儻忽狡猾詆譖攬
柄甚則達于朝足亂治野則人莫必其命家
莫保其有大獄累興靡有寧歲列疆以來所未
嘗睹記者也饒公穆焉深思而毅焉沈斷機至

則應撻至不搖故人知公之靖嘿恬夷不知公
寔有以亢顏而特立人知公之厚蓄而重發不
知公寔有所以潛爲之制而使望之也意消夫
士民之表也士有風民有俗風俗則百年培之
而不足一旦潰之而有餘者也以茲迺稍就綏
輯而神叢之馮焉者亦旋以衰止吾鄉敦龐長
厚之故猶未至澌盡無遺者匪我公其曷以居
德善俗政之大經也此豈與矻矻簿書期會結
戎兵辦錢穀者埒能哉時方在壬癸間迨乙卯

夏公勲著勞久擢拜四川右布政使以行郡大夫余侯爲諸郡大夫紹余某不佞布一言之贈某攝總臺憲者七年每御史案部還輒獲以咨詢其行事益州天府之國也比年困軍興松潘建越之間多所徵發而越雋夷者邛都楪榆種也余所見凡再駕矣蓋裸性猶獸然喜則相摩怒則相齧部使者憚道遠且惡不時巡債帥墨弁恣睢計便利賓賦之外悉索以從或挺而走險則果復輕敵寢以償師而辱國遂規以章

撻伐之威召兵轉餉費且不貲蜀士夫嘗言三
蜀之租調不輸于司會者有年所矣夫先王制
要荒之服意革在羈縻之以俾自葆就非必臣
妾之也邇中丞吳公建越之役業底平請得爲
郡縣以比于播此石畫也當事者驟惑于草野
倨侮之辭而輕棄玉斧畫疆之地豈所以恢王
略而報蓋臣乎今蜀事之最鉅且繫久遠者無
若此饒公固吳公同年進者也試相與共圖之
然而蜀三面阻夷族部樊夥主爵者不以武健

之吏往而籍重饒公知饒公務道化必有以親附而訓定之誠長慮已公伯氏頃從晉藩徵入領太僕爲大正之卿行卽從蜀徵及公而公有弟郎祠曹修古禮文之典先是伯仲一時秉學憲前所稱世以儒術起家者也余疾事公之日長郡所興大獄悉屬侯聽讞而卒之雅與公旨合諸大夫爲徽州洪侯池州杜侯安慶連侯太平王侯尚未莅以別駕焦侯署署廣德倅柯侯均畿南之良而承式公者來集于宛拜送公

澄江之上詩有之滔滔江漢南國之紀蜀與吳
殆援江相表裏者也某耄矣感公之變俗而維
風功吾郡獨著抑且脉脉焉神與江流俱駛矣

郡太守廖公上計詩序

文翁爲蜀郡出行縣從學官諸生明經飭行者
與俱由是其地比于齊魯王益州欲宣風化于
衆庶聞褒有雋材請與相見使作中和樂職宣
布詩帝謂此盛德事是皆蜀事也而今蜀仁府
廖公來守寧郡龢德明惠政平訟理是時鼎祚

在博士籍仁府召置門下。劉席不賓假之羽儀。振其踣頓故亦郡陿陋。芟薄不足與宣文張敷。將文翁所繇以化蜀。意鼎祚或其人子淵而以風其衆庶者乎。明年己丑元會。天子當開明堂大受計執御者將先期脂轄拊驂而行矣。

上神聖瑩精吏治。營仁府理效必增秩賜金如漢故典。而會景運郅隆。婁臻嘉應頃且。謬遊于郊。頗以次興協律之事宜。必如漢舉知音善鼓雅琴可待。詔者鼎不佞謬竊爲詩二章而祖。

之江上其于中和宣布誠所未皇庶幾猶蜀諸
生備出入傳教令而已儻仁府選好事僮子習
而歌之安知無何汎鄉在歌中轉而上輦焉

送涇令張公奏計詩序

張公名嘗通 帝所其家在滻上三十三洞之
陽曰玉笥焉爲清真所藏符處今來爲涇又丁
令威竇子明爲令之邑繇斯以譚張公誠僕吏
矣故其政不繩法襲跡以意化而已三年當入
奏計余不俟辱在隣封勤公接遇得旁采風謠

擣撫故實而爲之詩

旌川岳令上計詩序

岳令姿神朗徹約言析理而又長于筆勞人之職非其好也然其爲旌川較焉著當官之譽蒙循理之聲豈所謂明鏡不疲婁照清流何憚惠風邪茲且上計會

今上方興吏道覽所奏上知岳令非徒善清談而已余周還最洽岳令嘗題余玄襟高韻嵇阮之倫余竟以君家彥輔許之于其行也贈之詩

盧令公入觀序

盧令公之爲吾宣凡三閱歲三試士而簡其儻若陳子劉子方子蔡子孫子若余從子輩者翔異之則二三子之于事令公父道也師道也今年冬仲令公以入 觀先期發有日二三子各出其志意陳圖稱詩以效駕而屬梅子鼎祚標其端余惟昔言師保父母非以生養而誨導之乎迺其生養在吏治誨導在師承故杜鄭不聞幹濟卓魯何關詩書卽官有纈職夫亦以世渺

通材焉然而漢郡國守令往往用經術高第推擇爲九卿我國初敦尚儒宿廣厲學官尋復特置督學使者董正之顧率歷婁歲一來則董取必一日之試而甲乙其文若夫考德問業易俗維風固不若郡邑之久而馴習而郡地執稍格又不若邑之近而易親也官故忝巖邑號士數方令公之蒞于斯也宣人士頗日以文著士風益以文日靡大較多借資而巧援上陽亢論而實熾趨遂使所穠孔邇者上漸欲其我遠

易親者惟恐其不我疏交相敝矣令公起家晉
國端方沈毅精心經術有西河之遺風其與宣
人士無廢禮亦無浮禮贊課有時進退有序及
數子之被簡異而衆固不帖然服以爲知言之
數子束修祓慮卽質疑辯難不輕跡縣大夫之
庭庶交相重也以交相成于是衆固不瞿然顧
化而比歲巧援虛亢之敝爲一廓如焉士四民
之首也士風正則民俗端孔子之告單父宰曰
毋迎而距毋望而許單父所與友事十一人孔

子謂可以舉善夫舉善而致之君此人臣之上
績也在漢盛時益部有中和樂職之詩四子講
德之傳其所爲中雅叶律彈緩舒繹者吾不知
數子之詠歌眎昔何如于以布循吏之質敏用
宣皇化之醇流要非爲私惠而不歸德者也令
公之爲美政于宣則有鄉先生蔡觀察識其大
者予小子固宣士也知令公之所爲造士者而
已矣异日司衡有用經術高第推擇而爲我
明天子之九卿也者必吾宣令公也夫

贈日者連生小序

沈君君典居約時重然諾叩其門不能以無爲解竟用破產裕如也時時杖馬筆過金陵吊六朝遺跡或登高長嘯四顧而悲人卒莫測之而豫章連生業日者在金陵肆中名藉甚君典偕曹耦造焉生按其支干大詫曰是夫也豪俠之倫必中庸人所睚眦者也已復鼓掌笑曰是必貴其五運余先生同稍按之起而拊君典之背曰不然當丁丑魁天下矣越數載爲丁丑則君

典魁天下如連生言余先生者太史公孟麟也
蓋甲戌第二人云梅鼎祚曰余觀連生恂恂好
下人取財不苟居嘗往來貴人間口絕不及貴
人與人譚大都緣數而之于道以成人之美史
所稱嚴君平子言依于孝臣言依于忠庶幾近
之類有道而數隱者也司馬子長上下百千載
表裏人物而爲日者傳若季主輩津津焉味乎
其言卽連生于佗禩祥榮辱之際頗著効所由
君典顯而其于宣城也由訪君典至故具論于

篇嗟夫非附青雲之士惡能施于後世哉天下
事固多如此

鹿裘石室集卷第十終